




Ս. ԱՏԵՓԱՆՈՍԻ ՏՈՆԸ ՄԱՅՐ ԱԹՈՌՈՒՄ

Դեկտեմբերի 25-ին, հինգշաբթի, տոն «Սրբոյն Ստեփաննոսի նախավկային և առաջին մարտիրոսին»:

Ս. Ստեփաննոսի տոնը միաժամանակ տոնն է Մայր Աթոռի բոլոր սարկավագների: Ինչպես միշտ, այս տարի ևս ավանդական հանդիսությամբ է նշվում սարկավագների տոնը Մայր Աթոռում, տոն, որը ուրախություն է պատճառում հոգևոր ճեմարանի ուսանողությանը և մայրավանքի միաբանությանը:

Մեծ տոնի առթիվ սարկավագները իրենք են ղեկավարում օրվա եկեղեցական երգեցողությունները և կատարում օրվա հատուկ հոգեգմայլ շարականների մեներգները:

Դեկտեմբերի 24-ին, չորեքշաբթի երեկոյան, Մայր տաճարում կատարվում է նախատոնակը:

Ապա երեկոյան ժամերգությունից և նախատոնակից հետո, Վեհափառ Հայրապետի բարեհաճ կարգադրությամբ և հոգևոր ճեմարանի տեսչության միջնորդությամբ, կիսաառկավագության աստիճան է շնորհվում Գլխարանի ուսանող ուրարակիր Կարպիս Գալստյանին՝ Մայր տաճարի փոխ-լուսարար պապետ տ. Հուսիկ եպս. Սանթրոյանի ձեռամբ:

Դեկտեմբերի 25-ին, հինգշաբթի առավոտյան, Մայր տաճարում հանդիսավորությամբ պաշտվում է ժամերգություն՝ մասնակցությամբ միաբանության և ուսանողության: Առանձին հուզումով հնչում է «Այսօր

դառք»-ը, որ սարկավագների խումբը երգում է միաձայն:

«Փառք ի բարձունս»-ի ժամանակ սարկավագները, սաղավարտ ի գլուխ, բուրվատ ի ձեռին, շարվում են ս. Ստեփաննոսի բեմի առաջ և միաբերան երգում՝ հրեշտակների օրհներգությունը, մանկունքը և «Ստեփաննոս քաղցրիկ տատրակ» տաղը:

Հանդիսավոր տոնի առթիվ Մայր տաճարում ս. պատարագ է մատուցում հոգևոր ճեմարանի տեսուչ տ. Շնորհք վրդ. Գասպարյանը:

Ս. պատարագի երգեցողությունը կատարում է ճեմարանի ուսանողական երգչախումբը՝ ղեկավարությամբ Արարատ արկ. Գալստյանի:

Հանդիսավոր ս. պատարագը շարունակվում է մինչև «Ողջոյն», այնուհետև կատարվում է սարկավագական ձեռնադրությունը: Ձեռնադրության կարգը կատարում է տ. Հուսիկ եպս. Սանթրոյանը: Խարտավիլակի պաշտոնը կատարում է տ. Հակոբ քին. Հակոբյանը: Ձեռնադրիչ սրբազանը նորընծային շնորհում է սարկավագական իշխանություն՝ ասելով. «Առ գմաքուր և սուրբ ուրարս ի ձեռն Տեառն մերոյ Յիսուսի Քրիստոսի... Կեանք քո և վարք քո լիցին օրինակ ժողովրդեանս»:

Օրվա տոնի նշանակության և ձեռնադրության հուզիչ ու սրտագին խորհրդով համակվել ու գրավվել էին բոլորը:

Ձեռնադրության սրբազան արարողության ավարտին պատարագիչ հայր սուրբը խոսում է բովանդակալից ու խրատական մի քարոզ, շնորհավորում է նորընծա սարկավագին և Մայր Աթոռի սարկավագներին, պատվիրում է զինվել ա. Ստեփանոսի արիությամբ ու հավատքով:

Հավարտ ա. պատարագի բոլոր սարկավագները, առաջնորդությամբ փոխ-լուսարարապետի և ճեմարանի տեսչի, գնում են Վեհարան՝ իրենց Հոգևոր Հոր՝ Հայոց Հայրապետի օրհնությունը ստանալու:

Հայոց Հայրապետը ջերմ սիրով ընդունում է Իր հոգևոր զավակներին և հոգեւից մի խրատականով մի անգամ ևս նրանց զինում իրենց ապագա ծառայության մեջ, որպեսզի լինեն «մշակք առանց ամօթոյ»:

Նույն օրը, ժամը 15-ին, հոգևոր ճեմարանի ուսանողական սեղանատանը տեղի է ունենում ճաշկերույթ՝ ի պատիվ սարկավագների: Ծաշկերույթին մասնակցում էին Մայր

Աթոռի միաբանությունը և հոգևոր ճեմարանի դասախոսական կազմը:

Նորընծա սարկավագին շնորհավորում են տ. Հուսիկ եպիսկոպոսը և տեսուչ հայր սուրբը:

Սարկավագներին ուղղված շնորհավորական ջերմ խոսքեր են ասում հոգևոր ճեմարանի դասախոսներ Ա. Հատիսյանը, Գր. Գյուլյանը և Պ. Ծահրազյանը:

Վերջում նորընծա Կարպիս սարկավագը շնորհակալության և երախտագիտության խոսք է ասում՝ ուղղված Վեհափառ Հայրապետին, հոգևոր ճեմարանի տեսչությանը, դասախոսական կազմին ու վանքի միաբանությանը, հանուն ողջ սարկավագների խմբի:

Բարեշնորհ Կարպիս սրկ. Գալստյանը ծնվել է էջմիածին քաղաքում 1947 թվականին: Վերջացնելով լոթնամյա դասընթացը տեղի միջնակարգ դպրոցում, 1962 թվականի սեպտեմբերին ընդունվել է հոգևոր ճեմարան:

